

## KPDNHEP ada cara pastikan barangan asas terkawal mencukupi

**Putrajaya:** Selain mengawasi harga barangan, Kementerian Perdagangan Dalam Negeri dan Hal Ehwal Pengguna (KPDNHEP) juga akan memastikan bekalan barangan asas terkawal untuk rakyat seperti petrol, diesel, gula, tepung gandum dan minyak masak sentiasa konsisten dan tidak pernah putus.


Berkongsi peranan KPDNHEP bersama BERNAMA dalam satu temu bual baru-baru ini, Ketua Setiausaha kementerian itu, Datuk Muez Abd Aziz, berkata harga barang sentiasa menjadi keutamaan pengguna, namun perihai bekalan barangan sama ada mencukupi atau sebaliknya kurang mendapat perhatian.

“Jika bekalan itu tiada macam mana?” katanya ketika melontarkan pandangan mengenai tanggungjawab dan cabaran KPDNHEP untuk memastikan kesejahteraan pengguna dan rakyat.

Berkongsi kaedah bagi memastikan bekalan konsisten, dengan memberikan contoh jika stok tepung terputus, Muez berkata, KPDNHEP mempunyai kuasa mengimport barangan itu bagi mengatasi masalah terbabit.

Berkaitan bekalan minyak petrol pula, katanya, stesen minyak yang terputus bekalan atau menutup operasi tanpa memaklumkan kepada KPDNHEP adalah melakukan kesalahan dan boleh dikenakan tindakan di bawah Akta Kawalan Bekalan 1961, di mana boleh dikenakan kompaun atau ditarik lesen operasi.

Muez turut berkongsi usaha mengawal harga dalam menghadapi kenaikan kos sara hidup menerusi inisiatif Skim Harga Maksimum Musim Perayaan (SHMMP) yang sudah ditambah baik menerusi tempoh pelaksanaannya dipanjangkan pada musim perayaan seperti Aidilfitri, Tahun Baharu Cina, Deepavali, Krismas, Hari Gawai dan Pesta Kaamatan. **BERNAMA**

 **Harga barang sentiasa menjadi keutamaan pengguna, namun perihai bekalan barangan sama ada mencukupi atau sebaliknya kurang mendapat perhatian.**

*Muez Abd Aziz,  
Ketua Setiausaha Kementerian  
Perdagangan Dalam Negeri  
dan Hal Ehwal Pengguna*